

uudâs 17.10.2023

Sämmilâš šonjâdâhräädî toimâškuođij

Sämmilâš šonjâdâhräädî čokkânij vuossâmuu čuákkimân Ruávinjaargâst roovvâdmáánu 13. peeivi. Šonjâdâhräädî ulmen lii pyehtid sämmilij tiätuvuáđu já uáinuid šonjâdâhpolitiik valmâštállâm uássin.

Šonjâdâhräädî válduášálâš pargon lii celkkiđ vâldikodálijn šonjâdâhpolitiik vuáváámijn, moh jođetteh aalmuglii šonjâdâhpolitiik já miäruštâleh, ete magareh šonjâdâhtoimah Suomâst tahhojeh.

”Tiäđu lasettem tave kuávlui já ässei eromâštilijn lii tehálâš, tastko šonjâdâhnuvástusâst láá eromâš stuorrâ vaikuttâsah tavekuávluid. Mun oskom, ete sämmilii šonjâdâhräädî pargo iššeed mii iberdiđ šonjâdâhnuvástus tuástum huápulâšvuođâ já siämmâst kavnáđ vuovijd, moi vievâst sâmikulttuur eellimvuáimálâšvuođâ puáhtá tuárjuđ veikâ šonjâdâhnuvástus hästee-uv”, iätá pirâs- já šonjâdâhminister **Kai Mykkänen**.

Sämmilâš šonjâdâhräädî asáttui vuossâmuu tove šonjâdâhlaavâ vuáđuld. Tot lii jiešráđálâš äššitobdeeorgan, mast láá 12 jesânid. Peeli jesânijn oovdâst tiedâsiärvus já peeli sämmilii ärbivuáválii tiäđu haldâšeijeid. Saavâjođetteijen tuáimá totkeetuáhtár **Klemetti Näkkäljärvi** Oulu ollâopâttuvâst.

”Persovnlávt mun uáinám, ete šonjâdâhräädî saavâjođetteimvuotâ lii ohtâ enâmustáá hästee já siämmâst kiäsutteijee pargo, mast mun lam lamaš. Mun lam ilolâš tast, ete šonjâdâhräädî peesâi toimâškyettiđ já ete tast lii eromâš pyeri ohtsâšvuoinâ já haalu rähtiđ pyerebijd hinnáid šonjâdâhnuvástusân vuáhádumân. Sämmilâš šonjâdâhräädî lii maailmviđosii tääsist áinoošlajâsâš. Tääli mij peessâp huksiđ maali, maht algâaalmugij tiäđuuh já tááiđuuh váldojeh täsiärvusávt huámmâšumân tiedâlii pargoost”, iätá Näkkäljärvi.

”Pargo algâmudo tiäddučuogâstâhhân lii šonjâdâhräädî tooimâ vuávám já ornim sehe tiätuvuáđu nurâškyettim. Mun oskom, ete šonjâdâhräädî puáhtá merhâšid uđđâ aalgâ tiedâsiärvus já ärbivuáválii tiäđu haldâšeijei oovtâstpargoost”, Näkkäljärvi juátká.

Ornijdemčuákkimist šonjâdâhräädân väljeui värisaavâjođetteijee, kote kalga leđe šonjâdâhräädist adelum asáttâs miel sämmilii ärbivuáválii tiäđu haldâšeijee. Čuákkim valjij oovtmiehlávt värisaavâjođetteijen **Petra Biret Magga-Vars**. Magga-Vars lii puásuituállee, tuáijár, jyeigee já taaidâr Vuáčust.

”Mij ärbivuáválii tiäđu haldâšeijeeh uáinip jieččân kulttuur já tom pirâstíttee luándu enâdâhmušton, ko mij šoddâp toos. Mii kulttuur konteevstâst láá miel di ovdebij suhâpuolvâi tiäđuuh, mättim já ravvuuh. Tienuuvt meid šonjâdâhnuvástus vaikuttâsah vyerkkejuvvojeh mii enâdâhmušton. Mist láá uáli ennuv tiäđuuh pirrâsist já ton aiccâmist, maid puáhtá paldâlistid tiedâlii tiätun. Lii historjálâš, ete mij lep täsiärvusii sajattuvâst tiedâsiärvusáin sämmilii šonjâdâhräädist ja mij pastep oovtâst uuccâđ čuávdusijd šonjâdâhnuvástusân vuáhádumân já pyeremuu muddoost ton estâlmân”, Magga-Vars tiäddut.

Vuossâmuu čuákkimstis šonjâdâhräädï vuávái aldapuátteevuođâ tooimâs já tooimâ keevâtlii ornim. Šonjâdâhräädï meridij valmâštâlškyettiđ huápumus pargon čäällimkode vuáđudem. Šonjâdâhräädï čuávuvâš čuákkim tuálloo 15.11.2023 Ruávinjaargâst Arctic Spirit – konferens ohtâvuođâst. Šonjâdâhräädï uásálist meid Arctic Spirit -konferensist tiedâlii panelân ”Tiedon yhteistuotanto ja ilmastonmuutos pohjoismaissa (Tiäđu oovtâst pyevtittem já šonjâdâhnuvástus tave-enâmijn)”.

Lasetiäđuh:

Sämmilii šonjâdâhräädï saavâjodetteijee Klemetti Näkkäljärvi, klemetti.nakkalajarvi@oulu.fi,
+358 40 537

[Tiäđättâs sämmilii šonjâdâhräädï aasâtmist](#)